

新鄭縣志卷二十六目錄

藝文志六

明

宋濂

許魯齋先生贊

補

~~薛瑄~~

許魯齋先生祠堂記

邵進

幽勝寺碑記

補

劉槃

重修卧佛寺碑記 補

屠浦

新鄭重建廟學記 補

史載德

新鄭甲科題名記 補

重修水月寺碑記

陳鳳梧

祭歐陽文忠公墓文 補

王廷相

明故工部都水司郎中進階中憲大夫高公墓誌 補

黨以平

石洞寺碑記

高尚賢

重修廟學記

新鄭縣重修東嶽廟記

重建清源義勇祠記

楊處士墓表

和春

重修譙樓記

郭樸

明贈光祿大夫柱國少師中極殿大學士高公神道碑

茅坤

讀鄭風跋

魯恭王朱頤坦

送高存菴先生之任山西憲副敘

補

高拱

懇恩辭免重任疏

三首
補

鄭大夫子產祠碑記

漢留侯祠碑記

尊恩閣記

鄭聲辯

上巳祓禊解

補

與河南諸當事書

六首
補

方瑜

重修歐陽文忠公祠墓記

補

歸有光

上高閣老書

補

吳栢舟

重修譙樓記

補

張一桂

壽少師肅卿高公敘

補

安九域

創置學田記

補

劉仲達

高新鄭處置西邊事宜記

補

范守已

代張夫人昭雪抑枉疏

補

代張夫人乞補卹典疏

補

郭正域

明太師高文襄公墓誌銘

馬之駿

高文襄公集序

補

徐鈇

新鄭縣儒學創置祭器書籍碑記

補

郭正位

改建社稷壇碑記

補

劉同升

明新鄭令忠烈劉公傳

新鄭縣志卷之二十六

藝文志六

明

許曾齋先生贊

宋

濂

浦江人

濂洛之學傳自武夷重徽疊照日星昭垂逮我許公尊聞行知若親
摳衣寒泉之糜張皇幽渺釐析毫絲如臯陶淑問畢其情詞如后羿
注矢不失其馳旣入閩域遂升堂基橫經胄監衿佩鏘如祛其人私
牖其天籟釋其偏岐挽其九衢德成財達昭用如時黼黻帝治甄陶
泰熙明體適用公實庶幾無德弗報四海祝尸嗚呼許公百世之師

見潛
溪集

許魯齋先生祠堂記

薛

瑄

河津人

新鄭縣西大隗山之左里曰陽緩元魯齋先生許文正公所生地也先生世家河內金季其先人避兵是邑實生先生於里中金太安已巳歲也縣學有祠以祀先生其事具於碑今碑存而祠廢士大夫儀型與凡民向往羣嘆以爲缺典江西鄧麟訓導邑庠乃卽夫子宮墻東隙地構屋三間作先生像於中以時致祀旣而求記於河南僉憲劉公咸公以推余余猶憶往年過是邑鄧方謀作祠又二年再至祠成矣鄧之志可嘉哉於乎先生之道之德之學所以紹程朱之正傳淑萬世之人心者固不待新學小生之贅贊也獨念是邑乃先生誕生之地祠宇久廢人心缺然無以寓敬鄧能因心興事作新斯宇使

凡進謁庭下者如親炙先生若充然有得而退其有補於天理民彝不淺矣遂書其事以告後之人俾無替於承祀云

見敬軒集

幽勝寺碑記

邵進

邑人

佛故西方聖人焉以大圓覺設一切空以大慈悲度一切衆始於不言而至於無所不言無所不言而至於無言是爲佛法最上乘如以薪傳火薪盡而火不窮也故世尊拈花迦葉微笑超然獨得尚何可以言語求哉其後達摩祖師西來入中國居嵩山少林寺面壁者九年惟傳心宗至今名著宇宙是皆能化人爲善師範後人者也尚朗上人俗姓徐自幼脫障出家卧佛寺旣長爲避喧煩移居幽勝寺明五眼淨六根奉戒持身明心掃垢見其性知其幾卓出塵表可謂無

忝佛氏之法矣寺南有大隗卽具茨山軒轅黃帝問道于廣成子其遺蹟尚有存者西有黑龍池每歲旱官民禱雨多有感應山川明秀景物穠華對待環拱迥出塵寰超然一勝概也又豈荒涼野刹之可比也哉一日朗上人屬予爲記刻銘于石故筆其大概用昭後世

刻

重修卧佛寺碑記

劉槃

邑人

邑之西一里許有崇岡焉岡之上有寺曰卧佛其創始之由莫可詳惟寺中有碑金時縣令張忱所立其記云唐咸通二年八月於縣城西門內勅賜興福院至宋雍熙三年僧法通重修後罹兵火金正隆丙子僧淨逸福興復修之元末復燬于寇我朝洪武初有僧智淨者

自山西來卽舊址創立草堂三間塑彌陀及諸佛像一年勅下改院
爲寺寺中舊有石佛卧像因易其名曰卧佛云自是而後住持雖不
乏人不過因循保葺而已未有作新之者洪熙改元僧會圓亨始主
法席念茲寺爲邑人所崇奉又祝延聖壽之所而狹陋若斯甚非所
宜乃殫心悉力蓄資積財又得諸紳士樂施遂盡撤故宇拓地廣基
始建大殿次伽藍殿次天王殿次如來殿又粧塑釋迦藥師彌陀阿
難迦葉諸佛無不莊嚴矣天順二年亨公年老復囑其侶圓亮圓達
繼之建卧佛圓通二殿甫成而僧行文與亮達等又建金剛殿選佛
場鐘樓雲堂以及僧房倉庫庖湏茶寮之屬靡不整潔成化元年亮
又獨出己財於卧佛殿前建浮屠七級高百五尺寺之規制于是始

備經始于洪熙初年落成于成化己丑凡四十餘年之久經營謀度巍然成一大叢林謂非諸僧之力不可也厥後亭公歸寂亮達各主別席追成化壬寅間風雨震凌諸殿漸有傾漏者時主僧明全復鳩金而新之煥然如昔亮之徒明英亦當時之協力者念衆僧苦力于前全公繼承于後懼其久而事湮也爰礪石以記其始末而備刻樂輸諸姓名於碑陰

見石刻

新鄭縣重建廟學記

屠 瀟

鄭縣人

新鄭之建廟學久矣蓋自宣德至今未有能修飭之者祀殿頽圯旣無以妥神靈而堂齋館舍日堙月敝諸生之問德考業者又無以裕其身振作其意氣衆甚病之比者餘姚黃君肅來知縣事顧瞻廟

周覽學舍乃喟然嘆曰朝廷以教養吾人爲第一事而肅猥承任使
今廟學不治將何以奉順德意夙夜祇懼圖維作新屬歲荒歉遲回
者久之旣而曰事有重輕緩急興學重事也顧可緩乎乃言於河南
左布政使吳公節督學僉事石公淮皆曰是誠縣令責也爲給材木
千餘檄令速爲之黃公遂鳩工相材而營度之縣丞王昶主簿申福
典史紀聰咸協厥志且命耆老董薰專理厥事邑之民富者捐資貧
者効力土木甃瓦黝堊丹漆之具不勞而集舊大成殿三間今以其
卑隘不足展祀事增爲五聖賢像居殿中者塑繪如制兩廡舊十間
今增其四又增戟門如殿之數易石柱於櫺星門而明倫堂東西齋
舍神厨倉庫垣墉之屬視昔倍加廣且麗焉氣象軒豁規模宏遠風

致爲之改觀矣于是教諭呂俊訓導羅珍相與言曰茲學之興我黃君意已勤矣不借重名筆何以昭示後人乃致書京師請予爲記予惟古之治天下者必本於學校三代之教可見矣雖諸侯亦有之學之廢興治道視之以爲張弛今藩省郡縣皆古諸侯任興學立教固職分所宜爲然世之人固有不能究大體祇德意而旦暮獎獎案牘期會以爲能趨走迎餞以爲賢者彼豈知學校之重且急然則黃君之賢亦豈多得哉夫所貴乎學者明道而已聖人之道本于心著于書自倫理之大至于物理之微能精察力行化于家儀于鄉推而達之天下此之謂善學而斯世斯民常必賴之奈何近世學者不知出此讀書而不務明道者有矣悖道而趨利者有矣束書不講僥倖一

切以苟便安者亦有矣波流風靡日以滋甚學者之通患也嗚呼士之所存所立無以異於人亦可愧之甚矣新鄭在昔爲中州文獻地先儒所謂家詩書戶禮讓爲天下先者今又得藩臬邑令之賢篤意學政興廢補敝于數十年之後易卑而高化汚而新凡游斯學者其德與學可不圖與之俱高且新哉靜處以思獨行以求吾宅心制事澡身浴德於聖人之道行之者云何大而綱常倫理小而事物細微於聖人之道明之者云何窮之所養達之所施幼之所學壯之所行吾之培養負荷所以施之家國天下者云何夫懵懵焉不知吾道所當爲者愚也知之而不能自立者懦也始勤終惰銜虛名而忘實學自賊者也嗚呼是豈朝廷教育之意哉且豈藩臬邑令興學崇教之

意哉吾固知新鄭之士決不爲此也工始于成化十八年二月一日
訖于二十年二月望日記成俾刻諸石非惟紀成績抑將以勵後人
見石
刻

新鄭甲科題名記

史載德 邑人

題名記其來尚矣我朝賜進士題名國學郡邑遵其制凡登名者題
名鄉學雖曰褒榮實則示勸懲也吾新鄭甲科人物舊載諸志詳矣
又刻板置於明倫堂左右成化間復書諸壁宏治癸亥冬邑侯吳公
仲紀恐敝壞易隳也欲刻石以便觀覽而垂不朽邑簿蔣君賢樂從
之時邑丞丁君璽自督部南還並邑幕袁君珙又協力贊相之工成
斯予題其端予惟學以進德修業而列名于茲之君子素所履也